

## А ж р и м

(жазони ўташдан муддатидан илгари шартли озод қилиш ҳақида)

2026 йил 11 февраль куни жиноят ишлари бўйича Қумқўрғон туман судининг очик сайёр суд мажлиси Қумқўрғон туман Ички ишлар бўлими биносида бўлиб, шу суднинг раиси Б.Тагаевнинг раислигида, М.Қурбонованинг котибалигида, тарафлардан Қумқўрғон туман прокурори ёрдамчиси Ф.Зикиров, Қумқўрғон туман ИИБ ЖХХ Пробаця гуруҳи инспектори Э.Қултоевнинг иштирокида, Қумқўрғон туман ИИБ маъмуриятининг маҳкум Ч.Исаевга нисбатан тайинланган озодликни чеклаш жазосининг ўталмаган қисмидан муддатидан илгари шартли равишда озод қилиш тўғрисидаги тақдимномасини кўриб ва маҳкумнинг 1-1908-2501/25-сонли йиғма жилдини ўрганиб чиқиб, қуйидагиларни

### а н и қ л а д и :

Исаев Чорихон Хамраевич, 1986 йил 3 апрель куни Тожикистон Республикасида туғилган, миллати ўзбек, Ўзбекистон фуқароси, маълумоти ўрта, оилали, 3 нафар фарзанди бор, муқаддам судланмаган, Қумқўрғон туманидаги “Қарсоқли Агро 777” фермер хўжалигида ишчи бўлиб ишлайди, Қумқўрғон тумани, Юксалиш маҳалласида яшайди.

Жиноят ишлари бўйича Қумқўрғон туман судининг 2025 йил 27 март кунидаги ҳукмига кўра Жиноят кодекси 277-моддаси 2-қисмининг “б” банди билан 1 йил 6 ой озодликни чеклаш жазоси тайинланган.

Тайинланган жазонинг : 6 ой ўталган,

1 йил ўталмаган.

Қумқўрғон туман ИИБ бошлиғи тақдимнома билан мурожаат қилиб маҳкум Ч.Исаевни тайинланган озодликни чеклаш жазосини ўташдан муддатидан илгари шартли равишда озод қилишни сўраган.

Маҳкум Ч.Исаевнинг йиғма жилдида тўпланган ҳужжатларга кўра, унинг ижобий томондан тавсифланиши, белгиланган тартиб-қоида талабларига тўлиқ риоя қилганлиги, озодликни чеклаш жазосини ҳақиқатда ўтаб келаётганлиги, интизомий ёки маъмурий жазога тортилмаганлиги ва содир этган қилмишидан пушаймон бўлиб, ўзининг ижобий хулқи билан тўғри йўлга тушганлиги қайд этилган.

Ўзбекистон Республикаси Жиноят кодекси 73-моддаси 3-қисмининг “а” бандида маҳкум ижтимоий хавфи катта бўлмаган ёки унча оғир бўлмаган жинояти учун суд тайинлаган жазо муддатининг камида учдан бир қисмини ҳақиқатда ўтаб бўлганидан кейин жазони ўташдан муддатидан илгари шартли озод қилиниши, шахс ижро этилмаган қўшимча жазодан ҳам озод этилиши кўрсатилган.



Шунга кўра, суд маҳкум Ч.Исаевга тегишли йиғма жилд хужжатларини ўрганиб чиқиб, туман ИИБ ЖХХ Пробация гуруҳи катта инспектори ва прокурор ёрдамчисининг илтимосномани қаноатлантириш ҳақидаги фикрларини тинглаб, маҳкумнинг шахси ижобий тавсифланишини, жазо ўташ даврида меҳнатга ҳалол муносабатда бўлиб келганлигини, жазони ўташ тартиб-қоидаларига тўлиқ риоя қилганлигини, интизомий жазо олмаганлигини, содир этган жиноятдан ўзига тегишли хулоса чиқариб олганлигини, ўз хулқи билан тўғри йўлга тушганини кўрсатганлигини, қилмишидан пушаймонлигини ҳамда суд томонидан тайинланган жазонинг учдан бирини ҳақиқатда ўтаб бўлганлигини инобатга олиб, Қумқўргон туман ИИБнинг тақдимномасини қаноатлантиришни лозим топади.

Юқоридагилардан келиб чиқиб, Ўзбекистон Республикаси Жиноят-процессуал кодекси 536, 541-моддаларини қўллаб, суд

а ж р и м қ и л д и :

Қумқўргон туман ИИБ бошлигининг тақдимномаси қаноатлантирилсин.

Маҳкум Исаев Чорихон Хамраевични ўталмай қолган 1 (бир) йил озодликни чеклаш жазосидан Ўзбекистон Республикаси Жиноят кодекси 73-моддаси 3-қисмининг “а” бандига асосан муддатидан илгари шартли равишда озод қилинсин.

Ажримни ижро қилиш Қумқўргон туман ИИБ зиммасига юклатилсин.

Маҳкум Исаев Чорихон Хамраевичга Жиноят кодекси 73-моддасининг 10-қисмида назарда тутилган жазони ўташдан муддатидан илгари шартли равишда озод қилиниб, жазони ўталмаган қисми мобайнида қасддан янги жиноят содир этган шахсга нисбатан суд ушбу Кодекснинг 60-моддасига мувофиқ жазо тайинланиши тушунтирилсин.

Ажримдан норози томонлар ўн кунлик муддат ичида шу суд орқали Сурхондарё вилоят суди жиноят ишлари бўйича судлов хайъатига апелляция тартибида, ажрим қонуний кучга киргандан сўнг эса кассация тартибида шикоят келтиришга ёки прокурор протест келтиришга ҳақли.

Раислик қилувчи

Б.Тагаев

